

Jí² 'láa² 'wii²¹² 'e gasii¹ in San Juan tíi² 'in jai² líi² Jesucristo

Júu³ tya' juncwii²¹ 'e cwo¹ Dios tsá²

1 1 Jmoo²¹ o'o 'e jí² lo cwáain¹ tya' 'in tyán¹ júu³ tya' Dios jacoón¹ jee²¹² jna' ca la jée¹ gi la mo 'wiin²¹² seen²¹ mo 'ii. Nanuu² oo'o júu³ tya'a joon nanee²¹² moo'o coon¹³ unnii²¹ i' joon gajóø² moo'o, gasaan¹³ a'a tya'a coon¹³ cwo²¹ o'o. **2** Joon gajnéi¹ 'e juncwii²¹ no jee²¹² jna'a joon gaee²¹ e'e jmoo²¹ o'o júu³ joon 'ee¹³ e'e 'naa' 'e juncwii²¹ no 'e jo tyéi¹ do. E juncwii²¹ no gateen¹ coon¹³ Ñu¹ u' joon gajnéi¹ jee²¹² jna'a. **3** Jmoo²¹ o'o 'naa' júu³ jilaa²¹ 'e ganee²¹ e'e joongi ganuu²¹ u' u' 'e ilisicaan²¹ naa' coon¹³ jna'a. Joon jna' oo'o 'e la ja² mo sicaan²¹ moo'o coon¹³ Dios Jmii²¹ joongi coon¹³ jóon¹ on Jesucristo. **4** 'Wii¹³ joon siin²¹ jna'a 'e jí² lo tyii' itsiin² mo 'e jløø³ moo'.

Dios jmoo¹ o jná² joo²¹ li taain²¹² tsá² juncwii²¹

5 'E júu³ lo ga'ee¹ Jesucristo jna'a, joon jmoo²¹ o'o 'naa' júu³: Dios 'in² tyúi¹ gi líl¹ joon ñi¹ o jilaa²¹, ce jiin¹³ xu 'e gó² jo sá² tya'a. **6** Wa jin² tsá² 'e sicaain²¹ coon¹³ Dios joon ngii¹ to² gó², tajuu²¹ mo 'ii coon¹³ jilaa²¹ 'e faa²¹ a joongi jilaa²¹ 'e jmoo¹ o. **7** Pe wana ngii²¹ i' jmai² 'e tyú² u' la ngi¹ Dios 'in tyúi¹ sicaan²¹ na' la jaain²¹ la jaan²¹ na'. Joon iuntyúu¹ i jna' jilaa²¹ tsaa² tyi' coon¹³ 'e jmi¹ 'øø²¹ i 'e gatuun² un tya' Jóon¹ Dios 'in sii²¹ Jesucristo.

8 Wa faa¹³ a' 'e jo 'e tsaa² 'óo³ o' tyiin² an' too² yiia', líi² na' tajuu²¹. **9** Pe wana røø²¹² na' tsaa² tyi' tyani Dios, i'fin² mo Dios tsaa² tyi' jiin¹³ la nifo² o. Joon iuntyúi¹ jna' jilaa²¹ 'e 'laa²¹ a' tsu 'ii²¹ røø² jmoo¹ Dios. **10** Wana faa¹³ a' 'e jo mo ga'naa²¹ a' tsaa² cwóo¹³ o' Dios tsaa² 'e tajuu²¹ mo 'i. Joon jo mo ga'ii¹³ na' júu³ tya' Dios 'e jai² to².

Jesucristo, 'in faa²¹ a 'wii²¹² tyi'

2 1 Sii³ na 'e jí² lo tyi'naa' yuun²¹ tyiia 'e jo 'noo² oo' tsaa². Pe wana gatøøi¹ tsá² tsaa² tya'a seein²¹ jaain²¹ sii²¹ Jesucristo 'in lí² faa²¹ a 'wii²¹² tya'a tyani Dios Jmii²¹. **2** Joon 'in Jesucristo jo ga'noo¹ o jiin¹³ coon²¹ tsaa². Joon coon¹³ la joon 'in Jesús do gatyii¹ jilaa²¹ tsaa² tyi' mo najúun² in. Joon coon¹³ la joon gauntyú² tsi Dios 'wii²¹² tyi'. Joon jon' jiin¹³ tsaa² tyi' gatyí², gatyí² jon tsaa² tya' jilee²¹ tsá² 'in taain²¹² juncwii²¹.

3 Wana nuu²¹ u' júu³ tyú² tya' Dios nee²¹ o' 'e galicwii¹ mo' 'ii. **4** Pe wana jin² tsá²: "Cwíi³ moo 'ii", joon jo jmoo¹ o nuu¹³ u', tajuu²¹ mo 'ii. **5** 'In jmoo¹ o nuu¹³ júu³ tya' Dios 'e la ja² mo 'iin²¹² in 'ido Dios jiin¹³ la

lí² 'e 'iin²¹² Dios. Joon coon¹³ la joon linee³ 'e 'e licaan²¹ mo' coon¹³ Dios.
6 Joon 'in jin² 'e sicaain²¹ coon¹³ Dios tñi² ngi¹ la gangii¹ Jesucristo.

'E júu³ 'múui² tyu^{2u} to²

7 Tsaru^{1u}, jo 'múui² 'e to² tyu^{3uu} no. Ca la mo 'wiin²¹² ganuu^{2uu}. Coon²¹ røø²¹ lí¹ 'e to² tyu^{3uu} no la lí¹ 'e niganuu^{2uu} la mo jéei¹. **8** Pe Jesús gasii²¹ jna' 'e 'míi² mo 'e júu³ lo 'e to² tyu^{3uu} no. Jesús do ga'láa² 'wii²¹² jmaa^{1a} 'elo joon ga'ii¹³ naa' 'e jmaa^{2aa}. La mo jéei¹ la jo mo licwii^{1na} Jesucristo lawa'a ngii²¹ⁱ li nnu²¹. Pe ti li ngii²¹ mo 'e nnu²¹ no. Na'láa² 'wii²¹² jná² joo²¹ li saan^{3an} tsu 'wii¹³ galicwii^{1mo} Jesucristo.

9 Joon wana jin² tsá² 'e ngi¹ li jná² joo²¹ tya' Dios joon 'ee¹ mo ruu²¹ⁱ ngii^{1o} li nnu²¹ gi. **10** Tsu 'in 'iin²¹² in ruu²¹ⁱ ngii¹ li jná² joo²¹ tya' Dios joon ce jiin¹³ coon²¹ jo 'ee sóon³ⁱⁿ. **11** Pe 'in tsá² 'in 'ee¹ ruu²¹ⁱ seein²¹ 'e ngi¹ li nnu²¹. Joon jo jnaa² jóøø² xiia'fu tsaa^{1a}. Lawa'a tsá² tiui² líi¹ⁱ.

12 Sñi^{3na} 'e jí² lo tyii', yuun²¹ tyiia, tsu niga'in^{2mo} Dios tsaa² tyii' 'wii¹³ tya' Jesucristo nityi² tya'a. **13** Sñi^{3na} 'e jí² lo tyii' tsacøøi¹³ tsu nigalicwii^{1moo} 'in gaseein²¹ mo 'láa² 'wii²¹² juncwii²¹ coon¹³ jilaa²¹ 'e sá². Sñi^{3na} 'e jí² lo tyii' simii²¹ tsu nigali^{2oo} 'in 'liii³ do.

Joon gasii^{3na} 'e jí² lo tyii', yuun²¹ tyiia tsu nigalicwii^{1moo} Dios Jmii²¹. **14** Joon gasii^{3na} 'e jí² lo tyii' tsacøøi¹³ tsu nigalicwii^{1moo} 'in seein²¹ mo 'láa² 'wii²¹² jilaa²¹ 'e sá² juncwii²¹. Joon gasii^{3na} 'e jí² lo tyii' simii²¹ tsu 'wii¹³ pii²¹ 'oo' joon ga'ii¹³ moo' júu³ tya' Dios. Joon gali^{2oo} 'in 'liii³ do.

15 Jo jmaa^{2aa} 'e 'iin²¹² naa' 'e juncwii²¹ lo jon'gi jmaa^{2aa} 'iin²¹² naa' jilaa²¹ 'e sá² juncwii²¹. Tsu wana jmoo^{2oo} 'e 'iin²¹² naa' juncwii²¹ jo i'iin²¹² naa' Dios Jmii²¹. **16** Tsu jilaa²¹ 'e 'i¹-tsi tsá² coon¹³ jilaa²¹ 'e suun²¹ⁱⁿ tsá² coon¹³ unnii¹ⁱ coon¹³ jilaa²¹ 'e jmoo^{1o} jloo³ tya'a jon' tya' Dios Jmii²¹ 'e la joon, 'e tya' juncwii²¹ jilaa²¹ 'e la joon. Jiin¹³ juncwii²¹ lo-o taain²¹ tsá² 'e la joon. Jo cwo^{2gi} Dios Jmii²¹ 'e la joon. **17** Ti li tyé^{1mo} juncwii²¹ coon¹³ jilaa²¹ 'e gó² 'e jmoo^{1o} tsá² 'e jo 'e to² tí². Pe jileei²¹ 'in jmoo^{1o} la to² tyu² Dios seen^{2mo} coon²¹ tøø^{2mo}.

Xiiala lí¹ júu³ jai² joongi xiiala lí¹ júu³ tajuu²¹

18 Yuun²¹ tyiia, tyan² 'áa^{1mo} nijó¹ i'íin² juncwii²¹. Joon nanúu^{2oo} 'e ijó¹ 'in 'eei¹ Cristo joon seen^{2mo} fúui¹ 'in 'eei¹ Cristo nano, 'wii¹³ joon nee^{21e} 'e ti li tyéi¹ juncwii²¹. **19** 'In tsá² do ga'wóo²ⁱ jee²¹² jna' pe jon' tsá² tyi' 'ii. Tsu wana galíin² tsá² tyi' la jai² jo ga'wóo²ⁱ jee²¹² jna'. Pe la lo-o galí² iliñi¹ tsá² tyú² 'e jileei²¹ 'in ngi¹ coon¹³ jna' jon' jileei²¹ líi¹ⁱ tsá² tyi'.

20 Pe Dios nigacwo^{1o} 'naa' 'in Espíritu tyú² tya'a 'wii¹³ joon ñii^{212oo} jilaa²¹. **21** 'E sñi^{3na} 'e jí² lo tyii' 'wii¹³ ñí³ 'naa' jilaa²¹ 'e la jai² jon' wa'a jo mo cwii¹ⁱⁱ. Ñí^{3oo} jon' 'e jiin¹³ coon²¹ júu³ tajuu²¹ jo 'ee la jai².

22 Joon wana 'in jin² 'e jo jo² gatyii¹³ in Dios Jmii²¹ Jesus 'in tyán¹ júu³ tya'a sii²¹ Cristo, tajuu²¹ mo 'in jin² la joon. 'In no 'in 'eei¹ Cristo. Jileei²¹ 'in la 'í jo røø²¹ Dios Jmii²¹ coon¹³ Jóon¹ on. **23** Jilee²¹ 'in jo røø¹ Jóon¹ Dios jo cwii¹ in jon Dios Jmii²¹. Pe wana jin² tsá² Jóon¹ Dios Jmii²¹ Jesús, 'in no cwii¹ mo jon Dios Jmii²¹.

24 'Wii¹³ joon cwotii¹³-oo' 'e ganuu²uu' ca la mo 'wiin²¹². Joon wana jo tuu²uu' 'e júu³ do 'e ganuu²uu' ca la mo 'wiin²¹² ijoon²oon' licaan²¹naa' coon¹³ Jóon¹ Dios joongi coon¹³ Dios Jmii²¹. **25** Joon Jesucristo ga'íi² jna' júu³ 'e icwo¹o jna' coon²¹ juncwii²¹ itoon²¹on' coon¹³ Dios coon²¹ tøø²mo.

26 Jmoo¹³oo'o 'naa' júu³ coon¹³ jí² lo cwáain¹ tya' 'in 'iin²¹²in cón² 'naa' too². **27** Pe Jesucristo gacwo¹ 'naa' Espíritu Tyú² tya'a joon jo 'ná¹ jiin¹³ jaain²¹ 'e²e 'naa' tsu 'ña'o 'in Espíritu do i'e²e 'naa'. Joon jilaa²¹ 'e 'e²e 'naa' jmai² 'e ja²mo jiin¹³ coon²¹ 'e tajuu²¹. Cwoseen²¹naa' sicaan²¹naa' coon¹³on la ga'e²e 'in Espíritu Tyú² do 'naa'.

28 Joon nano, yuun²¹ tyiia, cwoseen²mogii' sicaan²¹naa' coon¹³ Cristo. Coon¹³ la joon jo cu²-tsi' mi jnéi¹ 'ido tún¹. Joon mi jó¹ jo fa'ii²¹ líi²naa' tyaní¹i. **29** Tyú²-u ñí³oo' 'e jmai² 'e røø²¹ jmoo¹o Jesucristo. Cwoliñí³oo' jon 'e jilee²¹ 'in jmoo¹o røø²¹ jóon¹ Dios 'ii.

'In líi¹i jóon¹ Dios

3 1 Cwo'ii²du-'oo' xiiala 'iin²¹²in Dios Jmii²¹ jna' 'e gaunsii²¹ jna' 'e jóon¹ Dios jna'. Joon la joon líi¹na'. 'Wii¹³ joon 'in jo cwii¹in Dios taain²¹² juncwii²¹ jo cwii¹in jna' jon tsu jo mo galicwii¹in Dios.

2 Tsaru¹u' 'in 'iin²¹²na, la no líi¹na' jóon¹ Dios joon jo galinee²¹e 'ee ilíin²na' pe nee²¹o' 'e mi jnéi¹ Jesucristo ilíin²mo' la líi¹i tsu inee²¹mo' jiin¹³ la líi¹i. **3** Joon jilee²¹ 'in jéein¹ 'ii untyúí¹ yaai tsu tyú¹mo Jesucristo.

4 Jileei²¹ 'in 'noo¹o tsaa² jo untiin¹³in júu³ tya' Dios. La joon lí¹ tsaa² mo jo untiin¹³ tsá² júu³ tya' Dios. **5** Ñí³oo' 'e Jesucristo nicweei¹ ni cwoo¹³ juncwii²¹ 'e tyii²¹ tsaa² tyi'. Joon jo mo ga'noo¹o 'ido jiin¹³ coon²¹ tsaa². **6** La joon jon jilee²¹ 'in sicaain²¹ coon¹³on, jo ngi¹ to² 'noo¹o tsaa². Tsu jilee²¹ 'in ngi¹ to² 'noo¹o tsaa² jo mo ní² tiin¹³ jo mo licwii¹in Jesucristo. **7** Yuun²¹ tyiia, jo cwoo²oo' 'e cón² tsá² 'naa' too²: 'In jmoo¹o 'e tyú², 'in tyú¹mo 'i la tyúí¹ Jesucristo. **8** La joon jon jileei²¹ 'in ngi¹ to² 'noo¹o tsaa² 'in 'lii³mo 'i. Tsu la mo 'wiin²¹² ga'noo¹o 'in 'lii³ do tsaa². Joon najó¹ 'in Jóon¹ Dios jaxée¹i 'e nigajmaa¹a 'in 'lii³ do.

9 Jiin¹³ jaain²¹ jóon¹ Dios jo ngi¹ to² 'noo¹o tsaa² tsu Dios nigacwo¹o 'in tsá² do coon²¹ juncwii²¹ 'múui². Jo lí² 'noo¹gi tsaa² tsu jóon¹ Dios 'ii. **10** Lí²-i licwii¹mo' 'iin jóon¹ Dios joongi 'iin jóon¹ 'in 'lii³ tsu jilee²¹ 'in jo jmoo¹o 'e tyú² jon'gi 'iin²¹²in ruu²¹i jo líi¹i jóon¹ Dios.

Ili'nee²mo' la jaain²¹ la jaan²¹na'

11 Tsu¹ joon 'e júu³ nigan²u²u' ca la mo 'wiin²¹² lí¹ 'elo: Cwoli'in²¹²na' la jaain²¹ la jaan²¹na'. **12** Jo jmoo²¹o' la gajmaa¹a Caín, 'in líi¹ jóon¹ 'in 'líi¹³ joon gajngaa¹²mo ruu²¹i. ¿'Ee 'wii²¹² gajngaa¹³i? Gajnga¹²mo 'wii¹³ 'in ruu²¹i do gajmaa¹a 'e tyú² joon 'ii-gi gajmaa¹a 'e gó².

13 Tsaru¹u', jo jmaa²aa' tsa'goo²¹-oo' 'e 'eei¹ 'naa' 'in tsá² 'in jo cwii¹in Dios, 'in tí²-tsi jiin¹³ 'e sá² fu juncwii²¹ lo. **14** Née³o' 'e ca la mo jéei¹ jo 'in caan²¹na' coon¹³ Dios pe la no galicaan²¹mo' coon¹³ Dios tsu 'iin²¹²mo' 'in ru¹u' catyaa² do. 'In jo 'iin²¹²in ruu²¹i jo mo licaain²¹ coon¹³ Dios. **15** Jilee²¹ 'in 'ee¹ ruu²¹i lawa'a 'in jngaai¹² tsá² 'ii. Joon ñi³oo' 'e jiin¹³ jaain²¹ 'in jngaai¹² tsá² jo téen²in juncwii²¹ tya' Dios coon²¹ tøø². **16** Nee²¹o' 'e gacwo¹ Jesucristo juncwii²¹ tya'a 'wii¹³ tyi'. Joon coon¹³ la joon galitsáa¹mo-tsi' xiiala 'ná¹ 'e 'iin²¹²mo' Dios coon¹³ tsá² xeei²¹. La gacwo¹ 'ii juncwii²¹ tya'a la joon jon jna' 'ná¹ cwoo²¹o' juncwii²¹ tyi' tya' tsaru¹u'. **17** Wa jaain²¹ tsá² 'in 'oo¹o jilaa²¹ 'e jmaa²i to² tya'a jóø²i jaain²¹ tsaru¹u' 'in sityéein¹ jmi²¹² joon jo jmoo¹o feei¹-tsi 'wii²¹² tya' 'ido jo ñi³ii xiiala cwéi¹ jin² 'in tsá² do: "Iin²¹²moo Dios." **18** Yuun²¹ tyiia, jo to² 'íi³ wa'a jiin¹³ fáa³a': "Iin²¹²mo' Dios coon¹³ tsá²." Tyú²gi wa'a 'ee²e' tsá² 'e 'e la ja²mo 'iin²¹²mo' Dios coon¹³ tsá² coon¹³ jilaa²¹ 'e jmoo²¹o'.

'E jo cu²-tsi' tyani Dios Jmi²¹

19 Joon wa ngii²¹i' la joon cwoo¹³na' cwáain¹ yiia' 'e jo nitajuui²¹ jna'. Joon cwoo¹³na' cwáain¹ yiia' 'e jo nitajuui²¹ jna' tyani Dios. **20** Wana cwóo¹³o' tsaa² yiia' nee²¹o' 'e feei¹gi Dios lagi jna' joon ñi¹ Dios jilaa²¹. **21** La joon, tsaru¹u' 'in 'iin²¹²na, wa'a jo cwóo¹³o' tsaa² yiia' lí²-i seen²na' jo cu²-tsi' tyani Dios. **22** Joon icwo¹o Dios jna' jilaa²¹ 'e mii²¹i' tsu jmoo²¹o' núu¹³u' to² tyu²u coon¹³ jilaa²¹ 'e 'yaa¹-tsi tyi'. **23** Joon to² tyu²u 'e ja²mo líi²na' Jóon¹on Jesucristo joon tyu²u jna' jon to² 'e 'iin²¹²mo' la jaain²¹ la jaan²¹na' jiin¹³ la nigajin²in. **24** Jilee²¹ 'in jmoo¹o la to² tyu²u téen¹in sicaain²¹ coon¹³ Dios la joon jon téen¹in Dios sicaain²¹ coon¹³ 'ii. Joon linee²¹e' 'e téen¹in Dios sicaain¹ coon¹³ jna' 'wii¹³ 'in Esíritu Tyú² tya'a 'in gacwei² jna'.

Xiiala líi¹i 'in Espíritu Tyú² tya' Dios joongi xiiala líi¹i 'in sii²¹ anticristo

4 **1** Tsaru¹u' 'in 'iin²¹²na, jo jai² cwolín²¹naa' jilee²¹ 'in jin² 'e faa²¹o cwáain¹ tya' Dios. Cóon²oon' cwáain¹ coon¹³ ce tún² 'ee 'e faa²¹a 'ido. Nuú²uu' wana faa²¹a cwáain¹ tya' Dios owa jo faa²¹a 'ee. Róø²mo cwoo¹³ juncwii²¹ coon¹³ 'in tsá² tajuui²¹ 'in jin²in 'e faa²¹o cwáain¹ tya' Dios pe jo jo². **2** Pe 'naa' cwii¹moo' 'in Espíritu Tyú² tya'

Dios. Joon jilee²¹ 'in jin² 'e Jesucristo najó³ líi¹ tsá² faa²¹ o 'ii²¹ tya' Espíritu Tyá² tya' Dios. **3** Joon jilee²¹ 'in jin² 'e jo mo jó¹ Jesucristo 'e líi¹ tsá² jo faa²¹ a 'ii²¹ tya' Dios. Joon 'in jin² la joon 'ee¹ mo Jesucristo. Joon 'in tsá² 'in jin² la joon seen² mo fu juncwii²¹ nano jiin¹³ la nanúu² uu' ijalíin².

4 Yúun²¹ tyiia, líi¹ naa' jóon¹ Dios joon galií² oo' 'in tajuui²¹ do tsu 'in feei¹ gi 'in cwo¹ 'naa' pí³ lagi 'in cwo¹ pí³ 'in catyaai²¹ do xufiin¹³ tyu² 'ido to² juncwii²¹. **5** 'In tsá² tajuui²¹ do faa²¹ o jmai² tya' 'e sá² ni cwoo¹³ juncwii²¹ tsu tiíi²¹ jmai' 'e sá² juncwii²¹ lo. Joon líi¹ tí²-tsi tsá² taain²¹² juncwii²¹ núu² un júu³ tya'a. **6** Pe jileei²¹ jna' líin² na' jóon¹ Dios. Joon jileei²¹ 'in cwii¹ in Dios núu² o 'e faa¹³ a' joon 'in jo núu² un 'e faa¹³ a' do jo líi¹ tsá² tya' Dios. Joon coon¹³ la joon lí² tsáa¹ mo-tsi' 'iin faa²¹ la jai² joongi 'iin faa²¹ júu³ tajuu²¹.

'iin²¹² mo Dios jna' 'áa¹ mo

7 Tsaru¹ u' 'in 'iin²¹² na, cwoli'in²¹² mo' la jaain²¹ la jaan²¹ na'. Dios jmaa¹ a 'ii²¹ 'e li'in²¹² na' la jaain²¹ la jaan²¹ na'. Joon jileei²¹ 'in 'iin²¹² in Dios joon 'iin²¹² mo jon tsá² líi¹ mo jóon¹ Dios joon cwii¹ mo Dios. **8** 'In jo 'iin²¹² in Dios la joon jon jo 'iin²¹² tsá² jon'gi Dios mo licwii¹ in tsá² tsu jilaa²¹ 'e jmoo¹ o Dios Jmii²¹ 'e 'e² e tsá² 'e 'iin²¹² mo Dios Jmii²¹ tsá². **9** Jaan²¹ mo Jóon¹ Dios 'in seein²¹ joon gasii¹ in Dios 'i fu juncwii²¹ 'e 'wii²¹² 'ii lí² cwo¹ jna' coon²¹ juncwii²¹ 'múui². Coon¹³ la joon ga'e² e Dios jna' xiiala 'iin²¹² in jna'. **10** Gali'in²¹² mo Dios Jmii²¹ jilaa²¹ 'e gajmaa¹ a. Joon gasii¹ in Jóon¹ on fu juncwii²¹ lawa coon²¹ fa¹ 'e jatyí¹ i jilaa²¹ tsaa² tyi' 'e jo jmaa¹ gi Dios Jmii²¹ 'nii²¹ -tsi tyi'. Gajmaa¹ Dios Jmii²¹ la joon 'wii¹³ 'iin²¹² mo jna' jon' wa'a jna' 'ná¹ 'e li'in²¹² na' 'ii.

11 Tsaru¹ u' 'in 'iin²¹² na, wana nagali'in²¹² Dios jna' la joon jon jna' 'ná¹ -a li 'iin²¹² mo' tsaru¹ u'. **12** Jiin¹³ jaain²¹ jo mo ganii² in Dios pe wana 'iin²¹² mo' la jaain²¹ la jaan²¹ na' ngii¹ Dios coon¹³ jna' joon coon¹³ la joon untsiin²¹ jna' 'e 'iin²¹² mo Dios jna'. **13** Gacwo¹ o Dios Jmii²¹ jna' 'in Espíritu Tyá² tya'a, 'wii¹³ joon tsáa¹ mo-tsi' 'e ngii²¹ i' sicaan²¹ na' coon¹³ Dios 'e joon ngii¹ 'ido jon coon¹³ jna'. **14** Joon niganee²¹ e' joon jmoo²¹ o' júu³ 'e Dios Jmii²¹ gasii¹ in Jóon¹ on 'e jmaa¹ a tiin¹³ tsá² taain²¹² fu juncwii²¹. **15** Joon doñi'in¹² 'e Jesús líi¹ i Jóon¹ Dios Jmii²¹ ngii¹ Dios caain²¹ coon¹³ 'i la joon jon ngi¹ 'ii caain²¹ coon¹³ Dios.

16 Galinee² o' joon galija² mo líi² na' 'e 'iin²¹² Dios Jmii²¹ jna'. Jilaa²¹ 'e jmoo¹ o Dios 'e 'e² e tsá² 'e 'iin²¹² mo Dios Jmii²¹ tsá² joon jileei²¹ 'in ngi¹ 'née² i tsaruu²¹ i ngii¹ 'i coon¹³ Dios joon Dios ngii¹ o jon coon¹³ 'i.

17 Coon¹³ la joon untii¹³ jna' 'e 'iin²¹² mo' Dios coon¹³ tsá² 'e jo cu² -tsi' mi cwá¹ jmii²¹² li tséi¹ mi jmáa¹ a Dios Jmii²¹ 'ii²¹ tsu la líi¹ i Jesucristo líi¹ na' toon²¹ on' juncwii²¹ lo. **18** Jo 'goo²¹ o tsá² mo 'iin²¹² in la jai² Dios coon¹³ tsá². Mo 'iin²¹² in tsá² Dios coon¹³ tsá² xeei²¹ la jai² jo cwoo¹ i li'goo²¹ o. Tsu mo jmoo¹ o tsá² 'goo²¹ o ní³ tsá² wúu¹ coon¹³ 'e jmoo¹ o

'goo²¹o. Joon 'in jmoo¹o 'goo²¹o jo mo gaun'yee²¹i 'e 'iin²¹²in Dios la jai².

19 Jna'o' 'iin²¹²mo' Dios coon¹³ tsá² tsu 'wii¹³ nigali'iin²¹²mo Dios jna' jéei¹gi. **20** Wana jin² tsá²: "Iin²¹²moo Dios", pe joon 'ee¹mo ruu²¹i, tajuu²¹mo 'ii. Tsu jo ñi³ii xiiala cwoi¹ 'e jin²in 'e 'iin²¹²in Dios 'in jo mo nii¹i pe 'ee¹mo ruu²¹i 'in niganí². **21** Dios nigatyu²u jna' to²: Jilee²¹ 'in 'iin²¹² Dios 'ná¹-a jon 'iin²¹²in ruu²¹i.

'E nili¹o' jilaa²¹ 'e gó²

5 1 Jilee²¹ 'in jai² líi² 'e Jesús líi¹i Cristo, (øøi²¹-tsi tsá² jaain²¹ 'in Dios gasii¹in jajmaa¹a tiin¹³ tsá²) jaain²¹ jóon¹ Dios 'ii. Joon wa'a 'iin²¹²in tsá² jmii²¹ xuui²¹² i'in²¹²mo jon 'in xuui²¹² do. **2** Wana 'iin²¹²na' Dios joon jmoo²¹o' jilaa²¹ to² tyu²u coon¹³ la joon tsáa¹mo-tsi' 'e 'iin²¹²mo' jon jilee²¹ 'in tsaru¹u' 'in líi¹i jóon¹ Dios. **3** 'Iin²¹²mo tsá² Dios jiin¹³ mo jmoo¹o tsá² nuu¹³un jilaa²¹ to² tyu²u joon jo 'áai¹ 'ii²¹ to² tyu²u, **4** tsu jilee²¹ 'in líi¹i jóon¹ Dios gali¹o 'naai²¹² jilaa²¹ 'e gó² jmoo¹o tsá² taain²¹² juncwii²¹. Joon líi¹³o' 'naai²¹² jilaa²¹ 'e gó² 'e jmoo¹o tsá² 'in 'eei¹ jna' 'wii¹³ gali²mo líi²na' Jesús. **5** Joon jiin¹³ 'in nigaja²mo líi² 'e Jesús líi¹ Jóon¹ Dios lí²-i líi¹i 'naai²¹² 'e gó² 'e jmoo¹o tsá².

'E júu³ ja²mo ga'ii¹ Dios Jmii²¹ 'wii²¹² tya' Jóon¹on

6 Gasaai¹ Wó³ 'in Jesús do jmii²¹. Joon coon¹³ jmii²¹ 'e gasaai¹ Wó³ do joon coon¹³ jmi¹ 'e tuun²¹ tya'a mo júun²in je tún² do gajmaa¹a júu³ 'e la ja²mo najó³ Jesucristo. Jon' wa' jiin¹³ jmii²¹ do pe coon¹³ jmii²¹ joongi coon¹³ jmi¹ do. La joon jon 'in Espíritu Tyú² tya' Dios jmaa¹a júu³ joon 'in ja²mo 'in Espíritu Tyú² do. **7-8** Joon ni cwoo¹³ juncwii²¹ 'ni¹ 'ii¹³ 'in 'elo jmoo¹³ júu³. Joon 'e 'láa² 'wii²¹² 'in Espíritu Tyú² tya' Dios Jmii²¹, joon tí² tún² jmii²¹ joon tí² 'ni¹ jmi¹ 'øø²¹i. Joon jee²¹² 'ni¹ do røø²¹ júu³ jmoo¹³. **9** Wa 'ii¹³mo' lawa 'e jai² júu³ jmoo¹o tsá², 'e tyiin²gi 'e 'ii¹³mo' júu³ gajmaa¹a Dios tsu feei¹gi Dios lagi tsá². Joon 'e júu³ gajmaa¹a Dios jmo²o jna' júu³ cwáain¹ tya' Jóon¹on. **10** Joon jilee²¹ 'in jai² líi²i Jóon¹ Dios ñi¹o yaai 'e ja²mo 'e júu³ ga'íi² Dios cwáain¹ tya'a. Pe jilee²¹ 'in jo jai² líi² Dios sáa¹i Dios lawa jaain²¹ tsá² tajuui²¹ tsu jo mo ga'ii²¹i júu³ ga'íi² Dios cwáain¹ tya' Jóon¹on. **11** Joon 'e júu³ jai² ga'íi² Dios cwáain¹ tya' Jóon¹on jin² 'e Dios nigacwo¹ jna' coon²¹ juncwii²¹ 'múui² 'e taa²¹ coon²¹ tøø²mo. 'Wii¹³ tya' Jóon¹on gacwo¹ Dios jna' 'e juncwii²¹ 'múui² do. **12** Joon jilee²¹ 'in ngi¹ sicaain²¹ coon¹³ Jóon¹ Dios niga'ii²¹mo 'e juncwii²¹ 'muui²¹ do. Pe jilee²¹ 'in jo jai² líi² Jóon¹ Dios jo mo ga'ii²¹ 'e juncwii²¹ do.

Júu³ tyú² li gatséi¹

13 Nigasii¹na 'e jí² lo tyii¹ 'in jai² líi² Jóon¹ Dios 'e litsáa¹mo-'oo' 'e niga'ii¹³mo' coon²¹ juncwii²¹ 'múui² 'e jo tyéi¹.

14 Jo cu¹²-tsi' coon¹³ Dios tsu nee²⁰' wa mo mii²¹'i' 'e 'yaai¹-tsi Dios ití² júu³ tyi'. **15** Joon nee²⁰' wa ganúu²uun Dios júu³ tyú² tyi' nee²⁰' jon 'e ga'ii¹³mo' 'e gamii²¹'i'.

16 Wa nali¹³'i' 'e 'noo¹⁰o jaain²¹ ru¹u' tsaa² 'e jmoo¹ jo júun²in tsá² 'ná¹-a faa¹³a' júu³ tyú² 'wii²¹² tya'a. Joon i'íin¹mo Dios tsaa² tya'a wa jo ga'noo¹⁰o tsaa² 'e jmoo¹⁰o júun²in tsá². Sá²-a tsaa² 'e jmá¹ júun²in tsá² joon jo 'ná¹ faa¹³a' júu³ tyú² tya'a 'e joon. **17** Jilaa²¹ 'e gó² jmoo¹⁰o tsá² lí² tsaa² tyani Dios pe sá²-a coon²¹ tsaa² 'e jo júun²in tsá².

18 'Nee²⁰' 'e jilee²¹ tsá² 'in líi¹i jóon¹ Dios jo ngi¹ to² 'noo¹⁰o tsaa² tsu un'øø¹mo Jóon¹ Dios 'ii. Joon jo líi²¹'i 'in 'líi¹³ 'ii.

19 Nee²⁰' 'e líin²na' jóon¹ Dios joon tyu²u 'in 'líi¹³ to¹ jilee²¹ 'in catyaa², 'in jo cwii¹in Dios.

20 Nee²⁰' jon 'e najó³ Jóon¹ Dios. Joon 'ii-o nagacwo¹ jna' 'e licwii¹mo' Dios 'in jai². Joon toon²¹on' sicaan²¹na' coon¹³ 'in jai² do. 'Iin 'in Jóon¹ Dios Jesucristo. Joon Jesucristo Dios 'in jai² joon 'oo¹-o coon²¹ juncwii²¹ 'e cwo¹ Dios tsá² 'e jo tyéi¹. **21** Yuun²¹ tyiia, un'øøi²¹ yaanaa' coon¹³ jilee²¹ dioses 'in gajmeei¹ tsá² 'in jo jai². Amén.